


回風堂詩文集

PL
2708
.E6
v.1



Digitized by the Internet Archive
in 2010 with funding from
York University Libraries

YORK UNIVERSITY

JUL 03 2001

EAST ASIAN STUDIES

回風堂文目次

卷之一

悔復堂集序

寒莊文集題詞

浮碧山館駢文跋

蕤鄉詩集序

葉蛺仙遺稿序

定海縣志敘

向仲

堅詞序

三程詞題辭

朱穉谷翁自撰年譜第一敘

慈勞室圖序

南園小隱圖序

楊省齋先生六十

壽詩序

送章生歸處州序

應子穆翁八十壽序

蔡芝卿五十贈序

魏陔香六十贈序

俞仲魯表兄

六十贈序

邵廉三六十贈言

卷之二

陳鏡堂傳 陳翁秉耐家傳 王翁方清家傳 陳君
修府傳 洪君九韶家傳 陳君康瑞傳 徐君印香
家傳 童君家傳 節孝賀張宜人傳 王君家傳
蔡母翁孺人家傳 周母葛夫人家傳 虞補齋先生
事略 族兄汲蒙先生行略 虞君述 張君行述

卷之三

李君尹夫墓表 應君墓志銘 鄭君墓志銘 姚燕
祖葬銘 李府君墓志銘 王君墓志銘 朱府君墓
表 范君墓表 清儒林郎馮君墓志銘 陳府君墓
表 范母金恭人墓志銘 翁君墓志銘 董君墓志

銘 童君墓志銘 范府君墓志銘 劉君墓志銘
楊君墓表

卷之四

馮君墓碣銘 姜君墓志銘 葉君墓表 鎮海方君
墓表 林君墓表 清故奉政大夫董君墓志銘 余
君墓表 清故通議大夫三品銜浙江補用知府況君
墓志銘 洪君墓表 朱君墓表 陳君墓表 安吉
吳先生墓表
卷之五 保黎醫院題名記 市陳君造橋碑記 重脩鎮海後海

塘碑記 上海北市錢業會館碑記 鄭君遇害碑記

五十生日前告誡貞胥貞用 祭鄭念若文 祭陳

晉卿文 八世族祖簞溪府君墓祭文 祭汲蒙文

祭虞含章文 祭錢仲濟文 濠上樓題壁 蔡氏蒙

養院壁記 記梅墟丐 記賣餅者 書錢肆之傭

右文都八十首

謝晉墓志


童壽墓志

童壽墓志

童壽墓志

回風堂文卷一

悔復堂集序



慈谿馮并君木

悔復堂集二卷慈谿應啓墀叔申譔叔申天才閎俊勁
出橫貫不可羈勒年未三十漸趨韜斂厭薄少作十九
捐棄夙昔雅自矜尙凡所撰屬不輕眊人病亟余往省
視叔申泫然曰吾生平文章造詣自信宜不止此零蘊
奇緒流落人間甚無謂也不如毀之毋俾遺憾余流涕
尉薦且銳以編香自任則曰第慎之嚴繩勇削寧苛毋
恕吾今以沒世之名累君木矣叔申旣逝余蒐其遺篋

得稿寸許亟思刪次用踐宿諾逡巡半年大病俄作宛
轉牀第婁瀕于殆病中都不挂念獨念故人付託負荷
綦重脫有不幸九原之下胡顏相向一念忍死病以無
害將非長逝者之魂魄陰實相之歟病間深居發匳鰓
理汰之又汰十存二三所以體臨絕之意成自好之志
如是而已寫定得詩若干首文若干首合爲二卷俟付
殺青昔元結撰匱中集僅錄沈千運等七人詩二十二
首劉昫虛高視唐詩其詩流誦到今者祇十餘首傳不
在多也叔申冥搜孤造窮極微茫中年天閼壽不酬志
要其成就已超常倫雖單絃子唱聲響寂寥而特殊片

玉光氣自越平生久要期無曠負後死有責所盡止是
掩卷喟然可以傷心矣

寒莊文集題詞

余與含章相聞久乙卯之秋始因陳玄嬰定交時玄嬰
居後樂園吾二人得間卽造之越歲族兄汲蒙復就園
中都授生徒而洪佛矢亦時時來會園有亭有池竹樹
蔽虧光景蕭然可念數人者各有所蘄嚮每見舍文字
不以談一語異同則往復相詰難或斷斷持可不可乃
至交嘲迭詡以爲大適視斜光反薄園樹始悵然於日
之夕也自含章客遊汲蒙又別去佛矢亦以事不數至

獨玄嬰與余尉薦寂莫中向者談藝之意興稍闌珊矣
含章恆謂吾輩持論雖微不同要其心力所赴未嘗不
足託一途以自傳幸生並世宜互著名氏集中俾精神
意趣終古有以相接而無間于死生契闊之故於彼於
此其俱有賴焉吾與玄嬰絕歎之以爲深于情者言也
含章文簡澹微眇往往寓其旨于言外使人意而得之
平昔雅自矜矜凡所述造率首尾四五易稿然初不以
是廢其勤故所存視吾四人者爲多頃自上海哀寫近
文一卷見寄大都前所已見而覆加宋覈者其用心可
謂不苟矣余心知其意于含章無能爲役輒書卷端爲

著吾輩聚棧曲折之迹如此追念疇曩合并之樂邈焉
若不可以再誦君文蓋爲之忽忽不怡也

浮碧山館駢文跋

浮碧山館駢文二卷族兄舸月先生箸先生博聞瞻涉
尤究心鄉國文獻嘗預修本縣方志鉤沈索隱遠有功
緒中年以往累主講郡縣書院門庭著籍殆數百人爲
文章埶尙駢耦意度節族力趨翔雅不以奇伋亂費之
辭自銜撰曾燠駢體正宗三箋具稿二十巨冊用力最
審未及發槧而先生卒湛思閎識湮鬱沒世生平勤恁
箸書不三十年而若存若亡幾于無傳有識者所爲惜

惓而悲也先生撰箸已刻者祇匏繫齋詩鈔四卷是集
爲先生所自定其子某謀校刊之苦貲不繼將丐助于
人屬并一言以爲之先惟此短書簡帙其傳之之難已
如是而三箋之流布益無望已於虓士之窮年矻矻欲
以其心力餉遺後人者誠奚爲也

莚鄉詩集序

莚鄉詩集鄞范蔭侯廣文樾著廣文神秀媚學早著采
譽弱歲受知督學寶應朱文定公士彥以諸生隸錄詁
經精舍與項梅侶馬石民吳棖華諸勝流游學以銳進
尋舉道光十四年鄉試婁見絀禮部用大挑得教職歷

任慶元海寧嘉興杭州校官陶淑後進勤勤接納束脩
求誨恆充庭闈發聞成業蔚焉稱盛在杭州最久物論
歸之者彌衆寇患恟定晉豫大無應方伯寶時丁大令
丙募訾澹災文移牋啓一倚廣文以辨廣文日草數千
言因人敷辭不相糅雜沈摯悽切見者動心先後斂輸
存濟亡算光緒七年引年乞老優游子舍不關世紛飾
巾待期時至則行年八十矣廣文仁於接物勇於任事
周恤施舍若慰飢渴而天懷恬澹榮辱得喪壹不經慮
自其壯彊汔於耄年樂志墳籍顓顓靡怠夙昔尤喜稱
詩抒渫蘊蓄不溢其量嘗徧和陶淵明詩冲矜遠思克

葆清妙然不自銜售託旨古人獨寐寤歌而已後三十年廣文孫承祜緝香遺著都得詩若干首寫定二卷屬并校審并鄉里小生義不當有所論列謹次行義著之簡端知人論世庶資後之君子

葉蜨仙遺稿序

葉君霓仙愴定醞藉不驚紛華數上春官汔于不遇泊然而已生平微尚雅擅填詞取徑姜張分寸悉協雖所存亡多而單絲子軫歸于雅適尋其意旨要越常倫余與君年輩差懸戊戌客京師逆旅槃停朝夕奉手文字密合遂結忘年之契余嘗語君詞之爲道意內言外止

莽有言以有寄託入以無寄託出入於意內出於言外
匪直達詁實爲懸解君恆嗟歎以爲知言南旋而後罕
與人事端居多暇惟以矢詩自遣逡巡數載遽謝賓客
二十年來世變膠擾風流歇絕嗣音寂寥追惟疇曷晤
語清言微笑愔愔在眼日月棄我冉冉老至死生契闊
永隔天壤徘徊今昔之思蓋不徒爲君傷已屬伯子秉
成叔子秉良刻君遺著訖遂書其端用發歎喟

定海縣志敘

志乘之作羽翼惇史外史所領司會所掌輜使所采胥
於是隸焉開物成務其揆一也革政已還民義昭彰邁

會既殊取塗宜廣先正耆彥互立科條大抵統於一尊
畸於文勝倫脊雖具祛發蓋眇必執墨守之見以馭紛
綸之局斯又通人之蔽也定海懸峙海東山海之氣鬱
爲才秀遺文前獻灼然足徵顧自改廳爲縣縣歷星紀
風政推暨非復舊貫澄蕩拘牽更定阡陌鉤稽往復歸
於翔實非夫通方博瞻特立獨行之君子其孰能宏斯
業乎陳君以異縣之士當屬筆之任不偏人文兼進民
治因創損益務循其本舉凡文化之升降治理之消長
民生之榮悴風俗之隆汙疆域之沿革財賦之息耗物
產之豐嗇部羅州次體用賅備識大識小咸有統緒武

功朝邑顓侈高簡以今方昔寧但不媿之而已夫人羣
翕闢自簡之鉅孳乳錯綜莫竟畔岸民史有述籀其至
蹟絜其至渙箸詭化之迹探敷治之原斯爲美也每覽
曩史于州閭文物動舉槩較盈虛之數無徵不信闡往
昭來要惟方志矧在今世時制遷貿蘄嚮日新民彝物
曲都關閔悵造端於變動而立極於光明後有作者其
諸亦樂取乎是歟紬繹旣訖服其精能輒述要略用諱
並世

向仲堅詞序

蜀詞國也大山穹谷起伏槃互清雄之氣浹乎才性審

音君子感物而動觸緒造端回復隱約斂而不匿繁而
不殺複沓而不亂蔚若疇若鬱爲詞境恂悅離合之故
微乎其可思矣孟蜀趙崇祚以花間一集標舉聲家殊
呻窈吟千金一冶歐陽炯尹鶻孫光憲毛熙震之倫皆
以蜀彥駸駸其間李白導之先河蘇軾沿其來軫前喁
後于各極正變蓋蜀自唐五代宋世已來詞流之所宣
發事物感觸容有不同而深沈委婉稱其山川則無不
同也雙流向君仲堅以瓌詖之才當波蕩之會南浮江
浙北極遼燕家世蟬嫣箸聞蜀中而栖皇塗路恆犖焉
不得寧其居臨睨舊鄉鬱伊多感若與太白子瞻共其

飄悴者視歐尹孫毛輩策名偏朝銷憂暇日搴芳草于
故宇泝流塵而獨寫匪直詘信之殊趨抑亦慘舒之異
撰已君旣不獲展于世遭時渙浥益蹙蹙靡所於騁迷
陽卻曲吾道安歸黍離之痛匪風之思苕華萋楚之悲
一於詞抒渫之其詞清峻婉密若吐若茹雖植體先宋
要其深情奧思卽時時有夔巫間峯迴峽轉紆曲幽邃
之意樂操土風夫有所受將所謂苕發穎豎離衆絕致
者乎自頃轉張民流政散小雅曠廢荒陂交會君持志
也潔稱物也芳庶通比興之旨用申柔厚之教空江無
人參差誰思序君是詞蓋不覺感音而歎矣

三程詞題辭

子大先生哀其先公兩滄先生湖天曉角詞二卷及哲
兄彥清先生牧莊詞三卷傳合已作統標曰三程詞校
理斷手授簡徵題自湖天發藻名章迴句聲容並茂牧
莊揚其波瀾子大拓其門廡例之於詩鄴下墳簾每含
橫槩悲涼之氣擬之於筆眉山笙瑟不隊權書振宕之
風多寡雖殊蘄嚮斯壹一門洋洋會於風雅已湖天之
詞清雋朗麗動多警絕牧莊之詞鬱伊悽宕長於抒情
子大託體高奇宮商發越微吟澤畔聞嬋媛大息之聲
彈指花間致窈窕造哀之意拾芬芳於騷辯嚴分判於

令慢寧直家傳別集嗣響彌適庶幾樂操土風南音曰
競也歟子大曩自刊定巢詞若干卷晚歲理董頗有刊
落益以鹿川詞二卷凡三程詞都若干卷循誦既訖輒
墨卷尾藉申膺服之誠敢附喤引之末

朱穉谷翁自撰年譜第一敘

史有體曰紀傳曰編年史有別曰國曰方曰家曰人年
譜者人史也人史而編年者也或人撰或自次人撰者
述德則備校行則周紀言則通以贍其蔽也飾自次者
無夸詞無漏義無諱無過不及必審自次年譜奚自昉
曰昉之孔子孔子不云乎吾十有五而志于學三十而

立四十而不惑五十而知天命六十而耳順七十而從
心所欲不踰矩循年歲遞嬗之迹證行能漸進之序片
言賅括而畢生之本末具焉近世學者若錢竹汀瞿木
夫張月霄輩皆自譜其年其事皆躬行實踐之事其言
皆甘苦有得之言內當于厥心外無不可以告人趣昭
詞覈取舍犁然異乎子弟後進鋪張掇拾之紛紛耳矣
蕭山朱穉谷翁以明經大師取重鄉閭端居教授箸第
子籍者無慮數十百人中歲絕意仕進築室錢塘江上
倚農桑自贍給出而省稼入而課蠶布衣蔬食邈焉不
復問當世事五十而後井邑多故父老敦迫不獲已逡

巡復返其鄉尋被舉爲鄉議會議長興利革弊益廩廩以言職自靖鄉人悅服奉爲職志翁仁心爲質不屑標揭名行理董鄉政務旣其實值歲大歉飢民聚而譟噪望門投止冀得當圖一逞富室洵懼翁因勢利導巨貲頃刻立集按戶散粟所全濟無算革政之始盜賊颺起翁用兵法部勒鄉人徼巡扞衛晝夜更番不少懈奸宄斂迹遠近恃以無恐夙昔待人出于至誠病則餉之藥貧則遺之金隱約顧藉竭力之所堪而已無與焉迹翁所爲大率澹于處己勇于爲人道德旣孚而感被之情著將非所謂儒效者歟甲子之歲翁年七十叔子鄮卿

以翁自次年譜屬敘竊惟翁之懋行清望固宜有尊信而傳述之者顧或述焉而不詳詳焉而不諦其不能章聞潛德而塞鄉人之意猶之闕也翁以孔子從心之年取古人自述之義年經月緯舉其生平之所踐涉咸屬比以會其要揆翁撝謙之旨亦欲以是昭來許示子孫已爾不知積人成家積家成方積方成國國史之所甄采將必自一人始荀子有言言遠則略言近則詳略則舉大詳則舉小是以家乘詳于方志方志詳于國史取之雖簡儲之必繁然則是譜也下以增家乘之故實中以資方志之徵信上以備國史之要刪細大不遺要有

待于後人之論定而非馬班之自敘成書最舉大要者
比矣曩者龔璚人爲阮文達公六十歲年譜敘其末有
云俟公七十之年更增十卷之書當更敘之此其第一
敘云爾鄭卿言翁闇脩勤學老而勿倦神明彊固猶不
減壯盛時自今以往十年廿年三十年進德彌劭所譜
亦彌真實而有旨汔緒之日殆遼乎其不可期也遂援
龔氏例書之爲第一敘

慈勞室圖序

慈勞室圖者葛甥暘爲其母馮孺人作也暘少也孤孺
人竭心力拊畜之比長宦學四方旅處羈屑恆不得寧

厥居感於其母疇昔保家之苦與其今者夙夜瞻望不可奈何之情旁皇返顧以有是圖斯亦凡百人子者不得已之所爲作也余於孺人爲從父兄弟母俞恭人又先孺人姊也平居顧藉不異同氣每念孺人歸葛四十年天屬之乖門祚之衰落其顛沛蹙迫之境類非恆人所克堪孺人彊力支厲靡所于沮綢繆拮据僅乃得有今日是豈無所操而然耶米鹽凌雜之勞又不足以云矣孺人二十歸葛葛故舊家食指累數百翁性嚴厲有寵妾方用事姑鄭宜人慈而懦獨愛憐孺人顧力不足以庇孺人小心將順不使有纖微過差婁受訶遣略無

忤色鬱邑十載病瀕死者數矣迨翁卽世庶姑要與異籍孺人偕其夫奉姑以居夫又多疾疾少間則詣交舊藉博進自遣夜夜達旦歸孺人夜夜坐守之無何夫疾病孺人脇不貼席者彌一年夫卒未幾而長子又歿方是時葛氏之不中絕者幸耳孺人當危疑震撼之頃上事衰姑中撫弱嫠下督童稚凝神併力以與不可知之時命相舐距譬若泛孤舟於江海之中颶風驟至檣櫓摧折舟人相顧駭愕而行舟者方且從容鎮攝耳不旁驚目不旁眴把持挽捩務有以脫險而卽於夷雖無必全之算要不容不爲求全之計孺人之所以保持門戶

者亦若是則已矣癸丑之歲余盡室徙鄞所居與孺人
僅隔一牆時暘才十三四歲家難方稍稍定孺人則命
暘從余游一日之間暘足迹僕僕於吾家者不啻十數
往復暘體羸時時患作孺人憂惶萬端嘗摩暘頂笑語
余安得吾髦茁壯如犢子乎髦暘小字也余旣密邇孺
人殆無三日不相見面孺人每過我輒瑣屑談家常以
爲憂喜然勿能久淹久淹則鄭宜人促歸之使命至矣
蓋宜人年已七十許動止必於孺人姑婦共處一室寢
興服食幾須臾不可得離孺人五十之年身爲人姑而
其於姑也顧猶不改其爲新婦也茲尤孺人之孝所宜

食報于其子者不惟以勞而已也乙丑六月孺人六十
生日暘受室旣九載生二子矣將自上海歸蘄有以爲
母壽者遂次較略箸之圖右古人有言願君之無忘在
莒也暘乎爾亦無忘而母之勞焉耳矣

南園小隱圖序

南翔鎮屬嘉定南距滬三十里而強自路軌敷設行旅
往復時刻可達名商僑士四至而會遂屹焉爲滬北要
鎮其地川原夷曠林木蔚然深秀雖煙火日增而野色
四布視滬上有喧寂躁定之殊自滬來者樂其清空往
往裴回墟里抵暮而猶不欲歸其天勝也曹君蘭彬

殖滬上數十年矣中年已往冥心學佛追惟疇曩乘時赴會所以勞役其形神者日不暇以給入機出機不期而動反本之一念厭滬市溷濁思欲別闢蕭遠之境藉以攝靡散而歸之壹游南翔得所謂南園者驚而致之芟冗彌闢小加綴葺亭榭樹石繚曲幽邃或請易所署蘭彬曰立名取義適著意執園以南始亦必以終吾無容心焉卒仍舊貫署曰南園於虜可以思矣蘭彬意量恬逸恥以心鬪廢箸所入推恤寡貧顧不樂爲名高黯然自適而已夙耽詩事熏修之暇恆集勝流名德槃桓觴詠用爲樂笑旣獲斯園益思遂其嘉遯園側故有槎

水水波淪漣皎焉沖照若與虛明之性同其流止者臨
流容與憺乎證道妙於無窮茲可謂頤志弗營履道坦
坦者也夫自動而靜道之始也及其超豁動靜胥捐蘭
彬棲心玄邈雅不願以塵容俗狀淆其念慮旁皇卻顧
不得已退藏林野以自極其所可至何思之遠歟由是
而之焉不累不飾不徇於耳目內外之養畢足斯安時
處順無在不適乎坐忘之旨古人有言隱初在我不在
於物苟愜神明雖城市則可也然則蘭彬之於斯園特
贅託焉耳矣會蘭彬寫小隱圖屬序遂書之以廣其意

楊省齋先生六十壽詩序

并年二十二從游楊省齋先生之門先生令聞懋學門庭著籍份份稱感受知文字并則獨深越二歲并與先生同舉拔萃科先生尋以知縣需次江蘇浮湛十年所卒棄官歸而并亦溷迹校官一權麗水困不得復汔於靡就師弟之不諧於世亦其所性然歟先生外夸內介操行至嚴始至江蘇餘姚邵撫軍友濂聞先生名言於大吏聘先生爲其子師賓敬體貌日月弗衰邵時宦成居江蘇門生舊吏多據上游車馬紛逕過從甚盛一言援引立得美授先生深居養晦都無干託邵心重先生長者賓游高會必請與讌先生自惟身爲屬吏委蛇上

官匪直近慢亦幾於詔嚴閉固拒婁以疾辭久且不樂
引去同官竊竊以爲怪笑先生夷然而已江蘇號稱仕
國冠幘手版趨集如麻飛箝擗闔獲上有道先生以清
寒之資地秉孤耿之性韻懷才積屈末由小試不亦宜
乎先生宿究醫術旣歸隱不出則出其緒餘以濟生人
精明守數應時通變振瘵起廢被德無涖并羸質善病
自其少時卽非壯彊神勦形瘁眇不謂殆先生獨謂脈
象雖微遠有根著決其無虞赴官江蘇臨別贈處戒以
持養宜豫毋輕試藥并守其戒病以不害先生愛并綦
摯不異骨肉每聞并病不埃造謁徒步臨存案脈處方

猥猥無倦并恆私念平生所稟孱弱痰疾苛養百出爲厲適有天幸見煦仁者十餘年來心氣差壯性命所託則在斯人風義之篤蓋未嘗不感而唏也吾邑當前清之季宦達者尠一命之士稍流譽問常爲令長所咨倚旣干政地公私關說或不能無濡染先生心歎之平居約敕嘉遁守道牙署密邇非公不踐食苦澹泊惟以力醫所入贍給八口與其弟遜齋先生一門清望輝映士流鄉人交喙誦二楊焉革政以後議會牯立鄉里選舉雜流競進僧馴僮昏多預言職先生以名德耆宿長其曹耦念民生之多艱痛庶政之不舉亦欲展所蘊積助

州閭之敷設而發言盈庭等于一閨龐雜淆亂雷同嚮
應碩畫所及和者反罕大率什九不得見諸施行退而
歎曰詖辭亂政譎言敗俗以是爲輿論之職志庸有濟
乎生故骨鯁至是彌激稠人廣衆力持讜論馴至疾聲
厲色無所顧卹轉張闐茸之徒往往仄目以去升嘗謂
邑政解紐罔資適從挾私詭遇者抵巇排迕習非勝是
先生獨以峻裁方格摭拄其間風雨如晦雞鳴不已雖
彼衆我寡莫克相勝而閭閻清議猶有所寄無形之餽
補在彼不在此識者韙之甲寅六月先生六十生日配
周夫人亦與齊年同心之交承學之士咸從先生飲酒

賦詩上壽用爲樂方而屬并序之并聞之古訓仁必有
勇此儒家言也慈故能勇此又老家言也先生明醫愷
惻常善救人曰仁曰慈昭著蓋夙而貞懷亮節激昂自
將勢利不能移聲氣不能奪天下之勇莫大乎是惟仁
慈故心恬定惟勇故氣充然而無所于餒外召天和內
固靈明延年之道靡弗由此輒發其悒爲先生壽不及
夫人者敵體之義壽先生卽所以壽夫人也

送章生歸處州序

往余攝麗水學官處郡城二年所凡近治山水可游者
靡勿有其蹤跡烟嵐水石之奇往往狎而習焉而于其

邦之士大夫則罕有相通接者每登樺山望崇岡駢嶂
回薄鬱深謂宜有離世超奇之士出其間顧寂寥不可
得遇意常恨之罷歸近十年而章生叔言以弟子禮來
見與之言意量蕭然稱其山水也叔言困於貧別其母
客授吾鄉而性特孤冷對人恆落莫無一言顧獨暱好
余始余官麗水叔言未冠也其家密邇學舍叔言時余
出游輒自通於左右徘徊齋中手寫余詩文以去既習
余爲余誦之猶能畢其詞辛亥癸丑間余累喪其耦蹙
蹙無以自克叔言相從悽惘中所以尉薦之者萬方然
叔言故善悲夜闌被酒或忽忽長歎泣下其傷心殆有

不欲喻諸人人者竊惟余之寡諧居叔言之鄉曾不獲
一人與交遲之又久叔言乃自數百里外躡跡相尋而
至轉旋曲折以有此合併也氣類感通之故又安從而
意之叔言工文章所蓄積甚深少日治兵家言銳欲有
所爲旣而不樂棄去同學中多志得者婁招之輒拒勿
往往來申甬間倚傭書自贍給數世單傳年三十尙未
有子息一日將歸臨別蹙額語余今世事無足復厝意
然每念老母又使人不敢厭其生余對之亦無以云也
雖然處州多佳山水以叔言之才又足以發其奇奉母
偕隱寤譌以窮年世雖亂誠未見生之必可厭也行矣

叔言南明三巖之間山容壁色猶如昨乎吾昔年所題字猶有存焉者乎異日謝人事吾從子老于是矣

應子穆翁八十壽序

余故居在城東慈谿巷門前有槐樹三遠望青蒼際天爲遠祖翔宇府君所手植吾曾王父白於府君詩所謂門前大樹有槐花者也洎吾祖始他徙閱五六十餘年復奉伯父黎卿先生入居之其西爲應氏隣吾家亦百餘年方是時吾伯父暨應氏之老子穆翁年皆六七十余侍坐伯父伯父恆稱翁長者而翁之女孫曼昭日就吾婦俞受學兩家往來旣稔深有意乎翁之爲人後吾

伯父棄養越四年復邁婦俞之戚續娶於陳不半載又
逝余多病早衰重以家難游至益姁姁無好懷以視翁
之康彊壽耆蓋爲之惘然不能自克也自余移家甬上
不獲常接翁顏色而翁孫儒根又嘗受業於吾徒章生
叔言其事余甚謹道甬往返上海輒迂迴過省余因時
時得聞翁消息翁雖起家貨殖而恬退寡欲初不爲蟻
嗇亡厭之計壯歲客游朝鮮廢箸所入取足衣食而止
旣倦游歸卽以家事付之子長君渭漁築室舊居河干
爲翁頤養之所翁泊然處之蒔花種竹日尋其趣於寂
莫無人之境追惟曩昔隣居時每斜光欲落往往見翁

籠手門外夷猶煙水間候暝色上槐樹乃始掩門以去其神情澹遠至今彌可思也丁巳十二月叔言自慈谿至言翁明歲八十致其子若孫之意欲得余一言爲壽昔者王充氏有言百歲之壽人年之正數不至百者氣不足也夫所謂氣者非必顓係乎所稟之渥薄也見誘於利名而日以心鬪壯彊之夫有不可以一朝全者矣翁優游自適超其慮於耆欲得喪之表葆所固有靳所未至其必能充實其氣以盡天年無疑也熙甫傳筠溪翁謂古之得道者常游行人間不必有異翁殆其人與翁殆其人與

國風堂文卷一
廿
蔡芝卿五十贈序

余幼時體孱善病每病先孺人必遣迎陳丈秉耐至或一藥或再三藥輒瘳一歲中文足跡僕僕於吾之門者甚數丈愛余至而余之視丈也亦益暱稍長聞丈有聲曰蔡芝卿賢而有文章心竊慕之旣而卒因丈得納交芝卿芝卿勸學端謹不爲儻募弔詭之行迨成諸生益究心輿地之學凡中外形勢南北阨塞以及山脈水道道里風土詳分畧晰咸礪然有以會其要教授郡學垂二十年先後著弟子籍者亡慮千數百人七邑之士尊爲蔡先生而不名云自學校盛立士之挾一藝一長者

靡不倚教授自贍給一學之中率資教師十餘人師道
既濫學者不復奉一先生之言其視師恆不及夙昔之
重講習駁難往往齟齬不相浹洽下焉者勿論已乃至
名流耆宿被侮後生或朝登講席而暮卽喪其所操或
教之甲校而效教之乙校而不必效師若第窅然不得
通其意情志隔閼而學業因之失導不其偵歟芝卿以
摯忱篤悃感孚承學其所啟發初不大聲以色循循煦
煦若老嫗之詔其女被其教者怡懌化服雖極驚盪桀
黠之士夷然不屑以繩尺自循獨於蔡先生之片言單
訓殆無復有毫毛之齟忤蓋世變雖亟而積誠之所以

格人者猶如是也芝卿性慈和視世事若靡足拂其意者遇橫逆不平之施輒順受勿與校其語人動曰可憐可憐平日治學外無所嗜好獨好飲酒酒後益溫克或以語激之則斂袂微笑吾交芝卿自弱歲以逮於今蓋未嘗見其有所怒而作於色也芝卿前余一歲生辛酉之歲年五十矣追惟三十餘年前陳丈臨存撫視溫顏愉色猶若在眼而吾與子少日駘蕩之光景乃一逝而不可復追顏唐相對視丈當日始治余病時其年殆不啻過之故舊之情傳以遲暮之感其益使我低回流連而不能已於言也遂取君之德業性行著於篇將使兩

家子弟有所觀感俾知誠能動物無取意氣之爭而有以自全於亂世此則區區壽君之微意也

魏陔香六十贈序

余年十七從魏和潔先生游先生教授道廣著弟子錄者亡慮數十百人是歲主吾族人錦成明經家錦成與其弟辛存德成皆溫溫有文行而先生嗣君陔香滑稽玩世排調造出尤爲同學所樂與余於諸同學中年最少陔香覬其弱顏時時相嘲謔以爲樂每會食陔香伺先生神不屬輒爲種種詭態窘余余忍笑至不能飯先生微睨及之陔香之色驟莊先生或亦爲之一喟噤也

自先生卽世陔香益折節自策厲尋以光緒二十三年
舉於鄉其年余亦被錄選拔科故事選拔生與舉人得
稱同年陔香之母夫人故爲余族姊以師門之誼舅甥
之雅而又有同年之好於是吾兩人之分彌深而交亦
彌篤陔香雖以文學發聞顧好勤細務一事之集必尋
其端緒所在周思密慮必期妥帖無瑕璜乃已余恆目
笑陔香以爲此家人筐篋間事而不憚煩邪余性疏闊
嘗於世故遇親族有急難率倚陔香以辦陔香則爲之
鯁理調處展轉往復竭力之所堪而不以爲勞余或稱
謝卽曰休矣此君所謂筐篋間事也則大笑生平任俠

好義單門惇獨蹙迫呼籲動於哀矜之一念不惜蹈百
難赴之有朱某者以殺人罪繫縣獄陔香訶知其冤卽
與鄉人士詣縣辯白設詞甚峻縣令惡其訐直漫勿省
則陰助其家人訟理不得直上訴又不得直又上訴凡
再上訴卒脫朱某於獄獄成汔解前後幾年所壹切
橐籙之所資隸役之所供億訟牒紙札之所給與醵費
用贍乏絕集佐證據律例呼號奔走營救萬方雖由二
三鄉老左右其間要以陔香之力爲獨多其急人之難
濟人之困多類此者義問旣章販夫走卒婦人孺子莫
不稱誦曰蘭先生好人蘭先生好人蘭者陔香偏名也

陔香少嘗一游粵中四十後卽不復出居鄉日久於鄉民疾苦知之益審凡鄉政有厲民者公庭集議陔香則侃侃力爭雖府衆怨不恤平日繩督官吏最嚴尤好持官吏短長官吏新至陔香必曲折刺得其陰事以示藉端欲揭發者使之有所憚而不敢恣余嘗微規之曰將毋爲鄧析乎陔香傲然曰吾惟爲吾父老盡心而已禍患之來匪可逆睹以小民之脂膏作公門之羔雁彼錢東平又何以死哉蓋陔香稟吾先師敦厚之性斂而爲精實縱而爲伉爽畢生所見大氏不離乎履忠踐義者近是遇事激發年六十而意氣之盛猶昔霜降木落而

天地清明之氣以摯斂而彌肅吾有以覘陔香蓄積之
有素矣追惟三十餘年前讀書聚處忽忽如昨日事至
今同學存者幾何不特錦成幸存德成兄弟墓木之拱
已也而余與君猶得相從於蕭寥寂莫之境啍嚅慰藉
乃若吾生之靡有涯焉豈非古所稱爲幸民者邪然則
君意氣之盛遇事激發者又何爲也會陔香生日遂書
以諱之

俞仲魯表兄六十贈序

余幼時恆隨先孺人歸省外家其時外王母陳恭人春
秋高諸舅輩大抵三十四已上人出入動止率皆稟

承意旨不敢稍有所專輒帑幃之地穆然不聞譁競聲
蓋吾外家自北鄉內徙聚族城東數世矣期功以外雖
疏屬而親睦若同氣敬恭祀事少長畢會家法嚴肅造
次必依於禮其長老皆惇篤君子其子弟莫不率教受
約敕維謹詩書之氣蔚爲門風鄉之覘家者往往指目
小東門俞氏云革政以來禮教曠絕俞氏亦稍稍衰矣
獨我表兄穆卿仲魯諸君親炙先教少成若性而仲魯
內行淳至尤爲吾鄉所僅見其得植立風會之外屹焉
有以相持於弗敝者誠非偶然也仲魯爲我舅父筱亭
先生仲子兄弟姊妹凡九人儒素之家食指繁盛當我

舅父世已有岌岌不可終日之勢舅父故患喘疾疾作恆經旬不得寢息時諸弟幼弱仲魯與伯兄作舟更番迭侍按摩扶掖頃刻不離左右失眠廢食容色非人久之舅父棄養作舟困於貞疾不久亦卒仲魯仰事老母下撫弟妹一家上下男女二三十人居處飲食喪祭昏嫁之所資給悉萃而責於一己三十年來爲父母兄嫂及弟營喪者五嫁妹者三娶弟婦者四娶從子婦者一嫁從女者一爲子納婦者二嫁女者一供頓煩費雖高訾巨室猶不能以無索仲魯清門素士顧以一身負之而趨畢世顓顓年未六十而目眊齒禿已若七八十人

其憔悴枯槁之狀彌可念也仲魯自成諸生卽以授徒
贍養家人及學校興始壹意董理學務歷充杭州高等
學堂甯波中學堂監學最後長本縣高等小學兼東城
女學者幾二十年近歲又被任縣教育局長脩給所入
歲不過數百金諸弟中叔柱季調以學子勤以商雖友
愛懇摯然限於資地其力皆僅足自存不能多有所佐
助前歲子勤病歿寡妻弱子又惟仲魯是倚仲魯束身
至嚴舍食力外無復有絲毫非分弋取敝衣菲食刻苦
自厲舉凡裘穀肥甘人生愉適之享御一切剝奪俱盡
惟以父母所生之身還而致之父母焦神勞形務竭其

生於兄弟骨肉間而恬然不以爲怨以視古者繆彤姜肱之倫非但得幾之而已仲魯於穆卿先生爲從祖兄弟穆卿先生慈祥愷惻愛人本於至誠鄉隣有緩急不憚出全力援濟之年七十餘猶時時冒疾風甚雨以赴其行近於仁仲魯量稍隘董學而外不暇旁及獨懇懇以倫常之地自靖其德根於孝兩君者所趨若微不同而其所操以維系家聲者則無乎不同要之皆清修雪白擇地而蹈之君子也會仲魯六十生日余稔仲魯最詳心服仲魯亦最深義不可嘿已遂取其內行爲鄉人所不盡知者覩縷書之以見俞氏家法一脈之所存既

爲仲魯慰薦並以質諸穆卿先生詩曰雖無老成人尙有典型觀於兩君之性情風槩益不能不低徊於我生之初隨母赴外家時矣

邵廉三十六贈言

近世習尙每遇吉凶嘉會諸禮親友慶弔紛紜雜遝必舉一人焉以爲之主幹凡夫賚禮所會錢用所稽廳堂所敷設酒食筵讌所供頓僕役雜工所發遣指使悉於是集權焉吾鄉稱之曰總管其人必精明有幹局必持重能服衆心必夙著操守爲主人所信重非然者其事不能以辦史稱沛令有重客沛吏往賀蕭何爲主吏主

進吳中有大繇役及喪項梁爲主辦以兵法部勒賓客
及子弟曰主進曰主辦殆今所謂總管者類也才諳之
士伏處鄉曲溫溫無所抒渫恆託諸小事以自見蓋自
古然矣邵君廉三者其先故爲慈谿東鄉西邵邨人自
其曾祖遷居鄞西遂改隸鄞籍及君還居慈又復慈谿
籍君娶妻董氏其外舅某某翁無子家有紙坊卽招君
承其業君以商人居闔閭中和易坦率絕不沾市上譎
觚鬻滑之習市人喜其篤摯多樂從之游平日尤好排
解紛難巷衽里閭糾擾不可理君爲之平亭勸喻往往
夷懌罷去久之益得鄉人倚信自薦紳巨室下逮販夫

輿皂莫不曰邵老賢邵老有誠意不我欺也君旣取信於鄉鄉人婚喪諸事率一切倚辦君君更事多又習稔人每至一家輒條疏諸預事者名氏於籍若司某事若任某務若執某役若者可省若者不可省若者必備若者不必備繁簡華質恆視其家之有無以爲之準凡所部署秩序井然錢貨出內毫髮不爽人以是益服其精能矣余弱歲識君其時君新贅於董氏吾諸父行故與董稔因是君亦常蒞吾家迨余四十後移居鄞城彼此不恆見面比年避地海上踪跡彌復疏闊然君頗惓惓於余時以方物鄉味相饋餉聞余省墓歸輒徒步過存

余其深情可感也君續娶於應生子曰瑞華頃已抱孫數歲矣距吾兩人始識面時忽忽幾四十年嗚呼吾與君又烏得而不老哉戊辰十一月君六十生日瑞華抵書乞言余惟君居鄉日久恬淡安命初無琦行偉績可書顧一考其平生所更歷凡聞家故族煩蹟紛劇之務經君處分靡勿冰解縷析怡然得其條理馭繁舉重勝任愉快其精力誠有過絕人者取驗既往以測未來斯其獲壽之無有涯可預知也遂發此旨以爲君異日難老之徵瑞華試持是以進於而翁其爲我嘽然而酬一觴也歟

回風堂文卷一

回風堂文卷二

慈谿馮升君木

陳鏡堂傳

陳鏡堂字晉卿一字山岱慈谿廩貢生生而開敏讀書能通大義稍長益以節概自厲湛思韜默不屑屑爲標褻計同里葉大令意深獨視偉鏡堂赴官臺灣招鏡堂與俱意深故名宿富墳籍鏡堂得於其間肆力羣典宏演汎涉學以銳進性尤廉介布衣食貧不以一介累人先世所舉債悉傭書償之潛居剡山下躬耕教授未始有幾微不自得之色鏡堂雖澹定乎然其爲人骨鯁具

方格朋曹宴語恆退然不置一辭間涉於是非疑似間
卽誦言切慙無回飾鄉人鄭光祖使酒尙氣與人少所
可獨心折鏡堂嘗曰吾不畏羣兒罵畏陳生面劾也光
緒三十四年浙江高等學堂聘鏡堂爲教習竟病歿杭
州年四十有四鏡堂工文章所爲文淵茂密栗寢合古
義客死子幼稿佚無傳者

陳翁秉耐家傳

陳翁諱安煦字秉耐鄞人父順桂嘗刲股療親疾以孝
子獲旌於朝生二子翁其孟也翁少嗜讀家貧勿克竟
學至慈谿執業藥肆中暇則探研方書本草汔十年遂

以醫著求治者踵至翁處方審脊一衷於誠居慈谿數
十年與邑人梅調鼎楊逢孫交最篤梅楊皆耿介士於
人寡所許顧獨暱就翁杯酒往還竟日夕不忍言別翁
故好酒每醉貌益莊體益俯遇人或一揖去之市中人
往往指目以爲笑久之得酒疾以清光緒廿二年卒年
五十有七翁事父至孝婦楊氏亦宛淑能體翁意父性
絕嚴嘗因小故忤父旨父操杖逐之翁逡巡欲逃婦訶
曰止舅年衰勝蹉跌乎翁悟卽長跼涕泣請受杖父怒
亦解是時翁年已三十餘鄉人以是尤樂道之翁有子
二人自恨廢學早則命其次子祥翰習儒書後祥翰業

成官京師翁已不及見每念翁時時流涕也

馮并曰余幼時多病每病作先孺人輒延翁求治翁至卽復其初孺人恆語人陳先生生吾兒也翁體氣魁岸望之藹然長者後妻楊卒翁年未四十念其賢終身勿復娶云

王翁方清家傳

王翁方清鄞之東鄙人幼喪其父母爲人牧牛自給方春和時它牧豎多就樹下博嬉翁夷然驅牛去不與爲耦主人嘉其竺愿稍長悉舉田事以委翁忠於其職所獲恆倍隣畝數年儲庸直稍稍置薄田尋辭歸家先世

故業農穡翁益以勤勞自奮躬耕作苦舍田功不以食
其於田也若者宜禾若者宜黍亢庠乾涇隨地質爲調
適不使寸土不盡其力以是歲歲致羸息羸輒畜田久
之田大殖遂起其家翁旣廣積聚則顓以任卹弛舍赴
人緩急爲務閭里有義舉翁輒首輸訾爲勸造族人死
喪不克舉輒致賻助身自將護或具備棺器收葬以爲
常平居尤以農業倡導鄉人每語子弟百業唯農爲上
口體之養但求在我斯爲自立矣大商豪僧覩機赴利
殆無復有可久之道吾儕不勤自患脊無他歆爲也鄉
人感其言多兼功自飭厲或遇閥爭恒相率就直翁翁

不爲阿袒平亭排解率人人滿意以去嘗因事之鎮海
會天大風雪寒甚舟人不能支翁念其勞苦中夜令更
番休而自起操楫以行江昏水駛不自意仆舷外幾溺
死直宅舟過救之得免舟人引咎自責翁微笑而已其
仁厚多類此翁蚤歲失學常忽忽自恨年三十餘延老
儒於家每晚受課如學僮不三月識四五千字能操筆
爲書契卒年四十有六

論曰吾不識翁識其子斌孫斌孫服食先疇兼究心工
業務猥猥爲實行其家法然也嘗丐余爲文傳翁余遂
巡未遽應斌孫日自十里外就視余先後殆十餘反觀

於斌孫性情之摯卽翁可知矣

陳君脩府傳

陳君脩府字允六慈谿人蚤失怙恃事繼母甚謹家貧棄儒書執業闖闖中惡衣菲食自處清苦然能急人之急人以急難告卽罄所有濟之無靳色遇空無時則舉債以足其需奔走丐貸不啻飢寒之迫身也里有少年某累博累負無以償博進券其產詭詞求質君廉得其實要之曰審能矢戒者當有以相助某流涕告悔君卒爲貸貲一一償訖反其券曰裕則歸我無以質爲也某感悟後竟勿復博其與人爲善率類此生平篤於親故

族鄙戚里昏喪煩劇靡役不與從兄某歿君贍其室家授衣致餼存卹周至不以疏屬自諉君雖溷迹商賈而飭行絕嚴一介不苟弋取交友壹出於誠尤喜與貧士游處交勉互勗無幾微勢利之見故舊或小失德必反復鐫繩務督其遷改乃已語言煦煦往往窮日不休恆以是取憎於人勿恤也年五十一暴疾卒卒之日識與不識皆惜之以爲鄉里失一長者云

洪君九韶家傳子曰涇

洪君九韶字吾山慈谿人父逢時生三子君其仲也少而敦敏嗜讀以貧故棄儒書父歿子身走粵東鬻財往

復垂三十年家稍稍殖君天懷恢朗雖處闐闐不沾賈人纖嗇之習自以幼年失學則壹意裁成子姓用彌缺憾就其家闢怡怡書塾迭聘同縣林兆豐頤山父子爲之師林氏治經有家法君敬禮周渥凡所需要不憚委曲供億塾蓄書數千卷十九皆經部善本從師志也林君父子察其誠益感激教授各盡所量以予由是君伯子曰滂從子曰洵皆舉於鄉而諸子曰湄及從子曰溱等復先後成諸生一門之內文學彬彬嚮盛矣君以父命出後季父而篤於所生不以財業自分異與兄九畹第九英親睦終身未始有幾微齟忤年五十一病歿粵

東臨終顧言猶戒諸子謹事伯叔父語不及宅至今鄉之人誦友愛者必數洪氏也

曰淦字鼎三九韶叔子十三喪父矢志繼父業年二十二服賈秦中三十年間再出函關三入巴蜀足跡踔遠西北所至交其長商蓄賈通財轉貨務雍容爲誠信無何物情大洽交易者不他之而之君業以日上君冲夷有醞藉會稽之暇未嘗一日廢書讀書能識其大於古今政治得失學術升降靡不會粹而研討之賓坐雅言口纚纚如貫珠士流斂服見謂弗如矣兄弟五人多服習儒書家居不能治生產往往致困君以商所入贍之

與同母弟曰湄尤相愛甚客中得好書佳帖必多方遠致冀用沾勾雖重值無恤生平最重風義赴人急難若謀身事在蜀時浙人某逋官帑甚巨官責償亟將置之理某徧乞援同鄉不得君聞立脫數千金紓其厄一時僉曰義士義士而君始終無德色云民國四年客死重慶年五十

馮拜曰余與諸洪雅故於曰湄知之尤深曰湄伉直任氣外似徧至而內實淳備蓋漸漬於父若兄者然也嘗述其父兄行義屬爲之傳以備家乘遂弟之如此

陳君康瑞傳

陳君康瑞字玉如一字雪樵元初有紹者始自揚州遷
慈谿營別業城東隅曰幽遠堂十八傳至釗有清德鄉
里目爲長者生二子君其仲也以廩膳生員中式光緒
十一年舉人十六年成進士歷官刑部主事法部員外
郎法部郎中兼充法律館提調官處京曹二十年循流
平進澹乎若無所與遇事不爲可疚要於取適本懷絕
不以氣矜自著異遜國後遂棄官歸敝門隱約無復與
時流通聲息中年病重聽夙寡言論至是接對彌簡或
咨以州閭政要卽揚手指其耳嘿然清坐久之客逡巡
自去天性仁慈居鄉日鄉之嫗孀孤獨窮老可念者有

所勾輒不忍以拒力雖弗任必多方爲之處理必得濟
乃已尤篤內行與兄康壽友愛天至終身無間言晚歲
葺次家乘手自箸錄端楷好寫日盡十許紙無一字苟
者未汔稿歿臨歿猶惓惓以爲恨年六十有九子景禧
前卒以兄子元禧之子後焉

馮弁曰君爲諸生時集同縣馮紹勤何其枚林元址錢
保清陳翊清胡炳藻俞鴻懋爲文會稱勵社八子其人
大率澤於雅故用孝友自約敕踐履恂恂所由與詭時
夸世以爲名高者殊乎君矢詩數百篇冲和平實無偏
宕之音雖造詣非絕性分所至蓋闇然可思矣

徐君印香家傳

徐君恩綬字印香錢唐人同治十二年舉人內閣中書
餘姚縣學教諭家世儒秀至君彌自敕厲府縣試累蓋
其曹弱年成諸生以國子監典籍假常山縣學訓導粵
寇陷常山坐落職歸同治元年浙亂平總督左宗棠就
會城設振撫局檄君任其事明年佐縣人丁丙辦治善
後輯流亡蠲逋負罷征斂凡所持便不便大吏率循其
議爲興革綏靖休養民以獲蘇宗棠暨巡撫馬新貽錄
君勞會疏保君知縣見格部議汔不得請宗棠語人曰
徐某非躁仕者吾爲民社惜是才也尋又與丙理董善

堂兼綜湖工義渡局務區處擘畫百弛畢張不詭不隨
壹惟公實是踐州部蒙利退然不以自多由是人望益
屬之矣君天懷澹定處世接物渾渾若無町畦然操立
特嚴意所不概卽威利無所于屈胡光墉聞君名禮聘
君掌書記光墉鉅商與賈胡通聲息嘗有所咨商意不
能無降挹君見謂詔斂手謝弗爲後竟與絕其氣調如
此生平篤於內行事親奉兄恪恭天至居家儉約而獨
好給施周親耄稚孤獨可念者靡不殫力贍助賴以舉
火者歲蓋數家年六十四以儒官終有自立齋詩文二
卷藏於家子珂舉人孫新六游學外國歸皆著聞於時

馮升曰杭州當大難後井邑邱墟遺黎無所託命君以碩略清操受大府倚畀藉手敷設靡頗不平雖邁會稍塞良其功施所暨賢於出治百里遠矣流澤未沫子若孫遂持是以大其門詘於一時信於百世然則君之所遺於後人者庸有既乎

童君家傳

童君才甲字汝高一字良質鄞之東鄙人少歲嗜學以善屬文爲鄉老袁以燕陳熙績所稱譽數奇不售最後見錄學使者覆試終被黜意悒悒不自甘遂病病月餘竟死病革其父謀以人復進君念復值昂自分已矣卽

奈何虛糜重父累泥首枕上詞甚哀卒不肯服性行篤
摯事父母至孝母嘗患乳瘍經年弗瘳君朝夕在視一
切敷治滌浣之役率身任不以他委積久兼通醫理周
親故舊或遘疾君輒就治疾經手往往已君雖治儒書
顧量度恢閎恆樂爲人排解紛難里中兒爭田訟產長
官不能決得君一言立寢由是頗著名字鄉閭間卒年
三十有五

馮拜曰君從子第德篤雅士也嘗爲余言君不幸早世
無文采自表見顧鄉里父老至今道君行義猶有悵惋
大息者其爲人可知也子錦燦亦食於其醫處方矜吝

國風堂
不苟立同異蓋所繼述然矣

節孝賀張宜人傳

賀母張氏定海人年十八歸同里賀處士夢與生一子一女而處士卒母一慟幾絕既重傷舅姑心卽忍死自支厲制情飾貌轉相慰釋務求所以安衰暮者每清明上冢出郭門輒噉然哭失聲哀動行路比反又和豫復其初幼子相從瞪詫以爲阿母乍啼而乍咲也家故寒素平居不畜臧獲庖廚園溷井臼灑掃之役母率親給之自昧爽汔日晡拮据作治恆斯須不得寧息息卽篝燈課子女讀身績纊坐其旁不夜午不寢如是以爲常

同治某年粵寇犯定海初英吉利構釁舅嘗投軍自效
隸葛公雲飛部下積功擢司鑲糈至是被檄戍防地母
奉姑家處聞寇警倉卒掖老弱出避邨舍湫隘母夜脫
絮襖薦姑寢而自與子女藉藁取暖顛沛之中一切備
物維謹邨人難其孝饋漿存問者勿絕亂定家益困竟
以勞歿年三十有五凡守節十三年光緒二十六年以
子聖傳官贈宜人明年大吏上其事得旌節孝入祀節
孝祠

馮并曰宜人以堅苦之節矢保乂之志室家漂搖隕身
中道觀閔畢世曾不獲抒渫十一茲可謂艱貞矣聖傳

感母氏之劬勞銜恤惕厲克昌厥世而冢孫師章盛年
篤學且以榮辭懋行發聞州閭所謂不於其身必於子
孫者何其天道之章章可驗乎

王君家傳

王君克明字峻甫一字立山定海人父貫三贈通議大
夫母鍾贈淑人生四子君其仲也嘗值端午節市上雜
飴麥爲醅食謂之烏曼頭家戶大小恆用是供薦餉君
父困於貧先夕語家人來日令節顧無以薦節物恫祖
先矣因長歎君方六歲聞父言嘿嘿悲明早潛出門徘
回道周已乃趨河步拾烏鰂骨升許乞售藥店盡所獲

值市烏曼頭歸父見而疑曰兒小安所得錢將毋盜邪
窮詰始得實父持之泣曰不幸邊而溺奈何隣里交口
相詫道王家兒孝子也比長習貿遷上海時海禁初弛
遠西賈舶日月至君與其豪通游盡曉其語言文字賈
胡就時轉物率一切倚辦君君廉謹約敕不肯緣隙爲
爲奸利久之誠信章著業亦稍稍殖矣四明公所者鄉
人客死殯斂頓柩之所也章程嚴非介不通君念定海
僑人多貧苦勿習主者難於介死且無所歸乃首斥巨
訾立定海善長公所大要準法四明益廣置棺槨資緩
急或力不任市棺而又不安於求施則姑懸之直而緩

其償復斂金爲鄉賻會附身衣被之屬畢給以周鄉民之窮無藉者君年□十餘鍾淑人猶老健君思爲母營廣居旣而曰禮君子將營宮室宗廟爲先遂就城東建王氏祠昭穆旣序歲時祭享父兄子姓咸有所會於是鄉之人相謂曰上海客籍占太半縣屬未有公所縣有公所自君始定海徙治二百年族屬未有祠族有祠亦自君始也蓋君自幼小以汔衰暮其行義見稱人人類如此君質直寡言笑臨事激昂不以安危夷險易節蚤歲自上海歸中途遇盜虜以去盜出白刃脅君君夷然曰吾商人也寧能給若使令無如何但有死耳旣乃傷

心涕下曰君等獨無父母而忍羈我耶盜感其言留數日竟遣之還生平有氣敢任尤小心事其母光緒十年山右大飢母聞蹙焉不自寧君微察母意立解橐輸千金以濟朝旨用樂善旌其門衣冠多引重之入資得官知府加三品銜卒年七十有三子紹勛孫家佐家熾馮弁曰君以貧失學溷跡闐闐間泛覽羣籍每悒悒自悔疚然夷攷其行忠敬孚於蠻貊誠節昭乎殊類事親濟物仁孝兼至以視夫博學明辨言不顧行者何等也卜子有言雖曰未學吾必謂之學矣諒哉又何則古稱先之紛紛爲乎

四庫全書
卷二
蔡母翁孺人家傳

翁孺人鄞人年十七歸同縣蔡君惇富二十一喪其夫遺孤二人同源甫三齡同茂生十月耳孺人摧慟欲自殊旣懼增累舅姑卽忍痛不敢斲死家宿貧至是彌困孺人嗇衣節食惟推其飽暖於親有餘則以覆育二孤身雖疲無恤也惇富故有遺業在上海值不及百緡板屋簡陋市人弗之省孺人彊力支厲蚤起晏息務用勤慎自策擇材必堅諧價必準接對必和以婉閱市者稍稍顧之漸著漸贏漸贏漸拓業以日息孺人性寬坦舉止夷然喜愠不見於色顧教子獨嚴同源出就外傳每

自塾歸輒督溫習所受書不許一日舍書以嬉居上海
日久目睹市上華裔雜處非通彼我之郵且無以展所
業憾力微不得使同源專治域外文字但時時遣從隣
近賈胡游久之盡通其語言術數同源稍長遂令紹襲
先業同源秉承內訓益折節爲儉謹始於作力終於爭
時不二十年累致饒給視先世幾且百倍之矣同源旣
以商起家居處服御不能無所更張孺人訶之曰而忘
而母曩昔食貧忍苦時乎今日幸得自贍不以餘力逮
人而惟營營焉一身逸豫之是謀吾有以見汝之多怠
心耳同源承命悚然自此孳孳爲善一切體母意以行

存卹弛舍屢斥重貲無遴孺人顧而樂之笑語同源珍
錯非吾好兒能以糜食振人飢吾有餘甘矣裘毳非吾
願兒能以布絮庇人寒吾有餘暖矣廣廈細旃非吾樂
兒能繕道塗治橋梁以便行旅吾有餘安矣孺人年五
十有九卒卒後同源同茂檢其遺篋絮衣補綴殆鮮有
完者

馮并曰吾友蔡君同常同源之族兄也其曾祖峴臺府
君富而好博施以義行被朝旌嘗立義莊於其鄉潘火
橋歲入田畝數千幼有教病有卹孤寡惻獨有養也孺
人每戒同源義行公之德吾族人被之至今然使族人

子孫衣斯食斯永永仰給義田而不復知所振作振作
矣或姑幸義田之取足贍族而不復知所擴充亦豈所
以報義行公哉同常母董亦十九而寡守節與孺人同
其勗同常也亦與孺人同嗚呼蔡氏之多賢母峴臺府
君之遺澤或且愈引而愈益無窮也歟

周母葛夫人家傳

夫人葛氏奉化人處士敬穆之女同縣周翁濟安之配
也所居曰前葛邨邨俗樸僿夫人獨端莊踐禮法既受
聘周值寇難周翁被虜去數月不得息耗或言翁已死
父卜之信謀改字夫人宅姓夫人矢不可曰道路流言

初無左證就令不幸猶當以一節自全何復屑屑爲也
父嘉其志議遂寢旣而翁果得脫歸周之宗親聞之莫
不爲翁慶獲賢婦云夫人十九歸翁事姑胡以孝聞胡
病經歲夫人朝夕在視躬執匱穢賤之役翁兼後叔
父夫人所以奉叔父母者不異於奉姑以翁注籍縣吏
不遑顧家家事無大小悉以身任賓祭之料理耕桑之
督率親屬歲時之饋問下至炊汲燂飪縫紉浣濯之微
旦晝顓顓未始有須臾暇逸抵暮翁返復佐翁課諸子
讀翁中坐夫人篝燈坐几旁雜治日中所不及治者以
彌其隙翁憫其勞戒少休夫人曰吾治事有程苟中程

雖勞甘也強休何爲翁顧諸子曰因循玩愒不如勤學之樂汝母之言其可思矣夫人明練有特識恆因諸子之材而施之教諸子中叔子駿彥最賢顧沈潛不見圭角翁以物力薄旣資長子駿聲讀欲令駿彥就商業俾贍家計夫人止之曰彥也精微聲也平實均之皆儒才也卒遣從名師游無何駿彥果以第一人成諸生聞譽播於州閭翁笑謂夫人曰是兒汝成之微汝且無以展所蘊徒妮妮爲庸賈耳翁前夫人八年卒是時夫人歲幾八十自稱未亡人行喪持服一依於禮駿聲駿彥游宦廣東馳驅奔走恆以違侍爲戚夫人每致家問輒自

誇健碩用相慰薦自民軍戡定東南駿彥益以勞績致通顯會夫人八十五歲生日駿聲駿彥兄弟率孫曾及親屬輩置酒上壽夫人從容謂曰昔之致富也以商今之致富也以仕汝曹服官久汔今家業無所增益斯異於俗吏之爲耳汝曹識之致富之道德富爲上學富次之財富最下汝曹誠能推衍吾教帥初不變則所以爲吾壽者而吾之樂亦與爲無窮矣夫人性至慈每見嫗孀老幼孤獨靡告者輒蹙然爲之不寧諸子有所進奉必曰吾不須此盍以資任卹乎駿彥以浙江省政府委員兼兩浙鹽運使復任陸海空軍總司令部經理處處

長俸給最豐里中義善之舉率承夫人之旨以行夫人年八十六卒子五人孫十三人曾孫十一人

馮拜曰吾識委員君久蓋恂恂君子也宦達已還不恆相見然聞其清操益茂處脂膏之地嚼焉不以自潤浙東西之數廉吏者於君殆無異辭躬行實踐較然不欺其志豈非漸於母教者然歟語云不知其母視其子觀於委員君之賢而夫人固已遠矣

虞補齋先生事略

君諱清華字希曾號補齋初名瑞鏗先世自定海徙鎮海之靈巖鄉及君世而虞氏聚居逾千戶遂爲鎮海著

族曾祖某祖某父某累世好善君生而穎慧蚤歲喪父
自傷孤露方就傳卽刻苦砥學勿懈弱年成諸生應鄉
舉者十有五終勿售君澹然不以置念居鄉恂恂守法
度而意量恢遠不徒以潔身自畫嘗曰君子居是鄉則
當謀一鄉之益食其土之宜而獨善厥身其若父老子
弟何用是鄉政之弛張興廢鄉人或責效君君必躬其
勞悴無所於讓中法之役東南騷然鎮海地濱東海警
耗日必數至人心益洶懼君佐縣令治民團部署謹嚴
合屬賴以安堵平昔尤究心水利鄉有小港蜿蜒曲折
一鄉灌漑資焉歲久堙塞農田蒙害巨君創議濬之按

畝醵貲事以大集工不踰時羣淤畢宣田夫饁婦舉食
其利歸功於君者殆泰半云學堂議起君以其鄉距縣
治遠念鄉民之失學則就舊有某書院改立靈山小學
凡所設備悉殫心力爲之童穉就學有方份份甚盛士
論多之革政之初君被選爲縣參議會議員既列言職
益銳以興利除弊自任每議一事輒往復窮究必徹其
中邊乃已同列憚君嚴亦未嘗不誦君公正也君任俠
好義能爲人排解紛難聞望既著凡族閭里爭往往不
之官而之君君徐出一言準其是非輒復理順冰釋驩
笑以去顧至誠出於天性絕不爲逆億矯飾之術其取

服遠近率以德化鄉懷其仁里慕其義蓋廩廩乎有陳仲弓王彥方之遺風矣春秋六十有二以民國四年夏時乙卯二月二十二日卒前夫人王後夫人倪子四定儀晉祺愚定侯女子二胡振藩樂俊璜其壻也孫七君篤雅耆爲詩家居諷詠幾及千篇而諸子類多才賢克振君緒文采照映後嗣彌劭斯所以昌君之名者將於是在輒著之於篇用諗世之君子

族兄汲蒙先生行略

君諱毓孳字汲蒙一字嗣香慈谿馮氏其先有叔和者五代時仕吳越官尚書二十九傳而至璟嘉慶六年進

士安東縣知縣是爲君之曾祖祖貞祿廩膳生父清榕
增廣生從祖貞祐道光十五年舉人子清模廩膳生無
後以君兼祧焉君前數世文學皆有聞君生而喪父母
姚孺人苦節撫之家貧甚孺人躬紡織用力入具脩脯
遣君就傅君蚤歲奇慧二十成諸生師事同邑魏廣文
啓萬馮舉人一梅治經益有家法督學歲科試恆以經
學最其曹尋中式光緒十九年舉人累試禮部不售充
景山官學教習期滿以知縣用年四十矣君識力絕人
讀書能會其通於古今學術源流朝章國故靡不博籀
而深思之尤熟鄉邦舊聞凡吾鄉聞家故族其家世系

統咸瞭然心胸間每里中昏喪燕會賓客畢集君輒能
歷舉其先世覩縷言之曰是爲某也孫者是爲某也子
者是其祖爲某某父爲某某行義若何著述若何官職
科第若何乃至推而之於支屬戚黨通家世好類能媿
媿焉道其詳若指諸掌以是鄉之人徵譜牒攷遺獻者
必就諮君焉君通悅自放不爲猗韋飢馱之行遇人簡
傲好談啁大談高睨或翹人疵吝勿顧中歲無所遇益
詭激不肯循繩尺有所不槩於中往往白眼嫚罵洩其
憤盈鄉人目爲狂生君彌自喜也至性過人事母盡孝
雖使氣聞母訶卽止四十已後母猶孺子畜之母怒輒

長跪請罪怒不解不敢起交友一出於誠舊交中或蒙
世訾君聞之大戚必反復剖白之乃已遇人有緩急君
必力以任雖勞神耗財無恤也與同里錢保杭陳訓正
及族弟并交尤篤并怡直好盡言恆掎君短刻繩無少
隱君不以爲忤嘗曰吾以君木爲諍弟庶其寡尤矣乎
其虛衷喜聞過蓋如此君明於決事凡所商度動中窾
要夙昔究心經世覲得一職自効旣遭母喪意慘沮不
樂依韋學校中託教授自贍給已乃謝絕一切屏處浮
屠中數年匡坐一室銳意目治點次六經四史諸子百
家言多徹首尾排日溫燖程課如童子讀書而外不復

厝意時局蓋世變人事日有以傷其心而君亦且偃蹇
老矣晚困於貧孑身走京師會今財政總長李君思浩
領幣制局君受署爲祕書上行走不數月遽卒君體氣
素壯自喪母後忽得嗽上氣疾每天寒輒發然不自節
攝留京師日日以游燕聲樂自遣卒前一日猶與人家
燕會旣歸覺體中小煩懣詰旦已平矣整飭衣履如平
常客有造之者談話方甚歡須臾疾作遂絕民國八年
十一月十九日也春秋五十有六娶桂氏子一彥軌孫
正由正聞并與君同出於明贈禮部儀制司郎中左泉
公逮吾兄弟之身已十世矣屬雖稍疏情則彌竺平生

行義惟并知之最審輒次其大略著於篇用備職文字者削稿焉

虞君述

君諱輝祖字含章姓虞氏先世自餘姚轉徙至定海金塘復自金塘遷靈巖鄉遂爲鎮海靈巖鄉人曾祖某祖瑞雲父定源母王孺人生君而卒君幼稟至性事繼母胡不異所生推愛弟妹將護無不至父性畏雷每雷聲作君必趨侍父側夜或夾父以寢往往申旦不寐雖童年鄉黨已稱其孝矣神解超雋讀書能條貫大義迨成諸生益好爲深湛之思通方適變務豐其蓄以應世需

光緒季年與同縣鍾觀光等勗立科學儀器館於上海
壹切規摹設施悉倚辦君先是風氣阻闕習儀器者大
率取給域外自館之立飭材具物講習制作駸駸與殊
國爭功苦廣儲博輸無假它求財不外溢而周用汔於
通國君之勞也君旣負先時物望鉅人長德多願折節
與交君夷然不以屑意中年已往旁皇求索惟欲託文
字以自存屬文顓尙簡澹曲盡言外微致不爲豐縟繁
殺之詞深情遠思冥搜孤造每一文成鉤稽往復率首
尾六七易稿其不苟如此初與族人景璜齊名景璜歿
君嘿嘿無所向久之始交陳訓正馮并訓正并心折君

文微用聲響色澤相繩君樂從其說益涵揉演迤爲渾
噩無端涯尋北游燕趙間出居庸度遼瀋入雲中經行
萬里凡大山巨川名都壯隘詩人所歌詠豪傑名將之
所用武升降臨睨徘徊感槩靡不於文發之最後居京
師用編輯自資給假日益治其文文日益有名是時新
城王樹枏桐城馬其昶方分領國史清史館事號稱文
學老師而桐城姚永樸永槩兄弟吳闓生並以能文著
聞都下見君文咸怙然意下以爲歐曾者儔也生平澹
定不悅紛華在京師日閉門寫書勝流文游而外罕與
人事接構終歲蔬食不近肉味晚就山東省長署祕書

既而不樂罷去明年被辟爲公府諮議官會鎮海人士以纂修方志事見屬卽便引歸歸不一月遽卒春秋五十有七民國十年辛酉四月一日也病亟語諸子曰吾死都無所恨獨念畢生微尙嫻在文字天盛之年不克極其所詣此可惋歎耳君自定寒莊文集二卷王樹枏序之桀印甫竟而君歿未刊者尙數十首臨歿戒其子付并刪次爲後集云元配沙繼配李賀男子子三和育和介和光女子子二孫二先澤先承

張君行述

君諱美翊字讓三一字簡碩晚自號蹇叟鄞張氏其先

當宋時始自滄州遷鄞明永樂間有尹肅者贅於本城
青石橋余氏遂家焉世稱青石張氏尹肅生誠誠生泮
官汀洲教授生國化國化生一相一相生遐勛貨殖起
家以孝友著聞鄉里生士培游姚江黃梨洲先生之門
是爲君之幾世祖曾祖宗城祖宇廣父延青君生周歲
而孤母劉宜人躬撫育之自幼卽耽學書卷而外無他
嗜好舅劉君鳳章爲縣大師賞其開敏悉舉所學以授
君潛心證羈積久勿倦弱歲成諸生與同縣洪君家汭
包君履吉袁君堯年輩因文學相切磨稱徵社十二子
聲聞日起督學善化瞿公鴻機兵備無錫薛公福成尤

嗟異君目爲瑋器光緒十六年薛公奉使英法義比四
國君隨使西征所至必推究其政法考核其風土審察
其形勢隨征五年銳意撰述成東南海島圖經土耳其
志等書都十餘種夙昔有志經世洞明時變不爲朝夕
風尚所囿自西游歸卽一意倡率名器象數之學啓發
後進強聒不舍鄉老訾議者颺起君夷然勿恤也新政
旣行君益負先時物望武進盛侍郎宣懷聞君名厚幣
聘君署之賓職會庚子變作海內震蕩君與山陰湯君
壽潛密贊侍郎力陳東南保守和約之策江皖楚粵衆
議僉同東南晏然賴以安堵君蓋與有力焉尋爲南洋

公學總理學堂號稱難治公學又爲東南大學箸學生籍者類多閎俊蹠蹕之士君開膺布肺一以真忱相感孚不三年學子大和無何公學改隸郵傳部君不樂引去學生留之勿能得臨行爲范金作佩章以贈藉誌勿諼云光緒三十三年南皮張公會敷祥符馮公汝驤更迭撫浙皆聘君主幕府事君以部民佐治瞭燭地方利弊凡可以爲父老請命者靡不殫心力赴之匡救贊畫被利甚溥旣而馮公調任江西又邀君與偕江西民風朴儻不與外人相習主客齟齬民教重案纍纍君壹主持平而以誠信棣通彼我情意內悅外服禍以寢弭數

年之間百廢畢舉馮公倚之如右手焉君澹然榮利
不巧爲趣舍名公大人傾心推轂君先後謝之政變後
回翔滬甬間被推爲旅滬寧波同鄉會長專以紓變經
俗懷保氣類爲己任遇人溫溫泛愛絕去枿鄂不爲峭
厲矯激之行然涉公私義利所在則深閉固距懷乎不
得相犯干以是物論多歸之揆事敏絕軼摘精微貫徹
首尾每有商咨立口立斷羣衆會議每折中君以準向
背性尤愛才樂道人善單慧片智動爲延譽窮閭寒賸
就學無方或遣歷瀛海或送入校序顓顓題拂如恐不
逮後生小子得所依歸往往奮起末流成學而去生平

爲學不主故常少年治詞章中年主經世五十以後恫
於士大夫夸狃域外國學散無友紀益反本推究故籍
冀以先民雅言扶植風氣一切遺文墜獻殘簡孤本不
憚展轉采獲次第校錄嘗謀刻四明先哲遺書普餉承
學目錄寫定後以絀於貲力未克措手時時引爲憾歎
平日最服膺曾文正自以出無錫薛公門下於文正爲
再傳弟子故爲文篤守曾氏家法嘉興沈君曾植嘗與
君指數當世文流目君爲寄湘鄉籬下用相嘲噓君彌
自喜也君處世坦夷而自治絕嚴內行猥猥老而彌劭
本於愛親推之戚族故舊有以空乏告者無不稱其望

以賙或坐貧失其產則爲贖而復之更失更贖至於再
三時亦以是自累然從不少褻於人家故清素藉筆札
自贍給數十年來所入不訾日用而外耗之任卹者殆
十四三奔走畢世至老而貧如故晚歲居家養痾造謁
者猶不絕嫗嫗孤稚鄉毗苦力坐左右常滿君解紛排
難籌畫萬端口疲於言手疲於書恆窮日不得休止兒
輩請少閒則曰苦人可念一援手之勞而忍靳耶其仁
心好濟物如此君以光緒二十年副貢生兩舉經濟特
科由江蘇候補縣丞累保直隸候補直隸州知州歷充
南洋大臣顧問官憲政編查館諮議官度支部諮議官

浙江諮議局議員春秋六十有八以民國十三年夏正
七月十日卒配鄭宜人前君七年卒子二晉謙女二適
范鍾壽陳紹舜孫八孟令安令貽令慧令鶴令定令新
令慶令

YORK UNIVERSITY

JUL 03 2001

EAST ASIAN STUDIES

回風堂文卷二

YORK UNIVER
JUL 03 2001
SAC ASIAN STUDIES



